

四庫全書

史部

欽定四庫全書

史部

浙江通志卷十八

詳校官給事中臣戴璐

檢討臣德生覆勘

總校官編修臣倉聖脉

校對官中書臣朱烱

謄錄貢生臣汪緣

欽定四庫全書

浙江通志卷十八

山川十

衢州府

西安縣
附郭

龜峰山

弘治衢州府志府治在其背西北則綴崢

嶸山

崢嶸山

弘治衢州府志今通廣門內小山鄭氏譜

云孫吳遣將軍鄭平以千人守崢嶸鎮即此衢州

府志王象之曰昔有柴宏者屯兵於此後乃譌為

崢嶸

孟郊崢嶸山詩疏鑿順高下結構橫烟霞坐嘯郡齊對玩奇石路斜古樹浮綠氣高門結

朱華始見崢嶸狀仰止逾可嘉

開明泉 弘治衢州府志在東隅開明坊

蓬萊泉 弘治衢州府志在東隅烏橋南

長街泉 弘治衢州府志在南隅狀元坊口

西安縣 城外山川

爛柯山 爛柯山志舊名青霞第八洞天爛柯福地

又名景華洞天在縣南二十里高餘千尺周回十五里其址二百步穿空彌亘下得平處可數十步因名石橋又名石室今石室在橋之右五里太平寰宇記一名空石山元豐九域志晉樵人王質見石橋下二童子棊質就橋下看之二童子指視質

斧柯爛焉

水經注東陽記云信安縣有縣室坂晉時有民王質伐木至石室中見童子四

人彈琴而歌質因留倚柯聽之童子以一棊核與質質含之便不復饑俄頃童子曰其歸承聲而去斧柯摧然爛盡既歸去家已數十年親情凋落無復向時比矣陸庶爛柯山碑記爛柯仙躅圖諜詳

矣觀夫巨石橫空矯如驚龍萃岷嶺劃拆際於穹崇
南走羣峰北控遐陸不遠人世宛如蓬瀛得非權
輿之初俾宅真仙而幽贊人民脫籠檻於茲地不
然者擾擾塵跡瀟灑靈踪高步遐躅相瞬而致則
樵夫之遇二仙其所以示化與何元造無睨而壺
中之日月可得而窺矣庶收於是邦迨茲五祀政
惟自守民亦安止乘春多暇爰弋心期冥搜信宿
機慮如洗顏然性復於靜靜復於真天地之萬類
吾生之憂樂將不介於胸中矣心境相傳不知吾
之遇靈境與靈境之遇吾與時元和元年三月十
八日胡翰青霞洞天游記山麓有寺曰寶巖觀曰
仙集觀右拾級而上飛梁橫亘通趾頂背石蜷如
蝦蟇其下劃然可居得地如坻者東西深百餘尺
廣半之巨木蔽空飄風汎木葉虛徐漫衍後先不
絕涼滿襟袖如坐碧雲蒼雪間求遺刻得唐宋以
來陸庶錢顓徐霖游釣諸名輩往往可識惟庶碑

最古劉迴遊爛柯山詩靈境偶一尋洞天碧雲上
爛柯有遺跡羽客何由訪日暮悵欲還晴煙滿千
嶂羊酒遊爛柯山詩採薪窮冥搜深路轉清映安
知洞天裏偶坐得棋聖至今追聖迹可用陶靜性
謝勛遊爛柯山詩宛演橫半規穹崇翠微上雲扃
掩蒼苔千古無人賞寧知後賢心登此共來往項
斯遊爛柯山詩步步出塵氛溪山別是春壇邊時
過鶴棋處寂無人詩古碑多缺探幽路不真翻疑
歸去晚清世累移晨陸游遊爛柯山詩盤輿訪客
過仙村千載空餘弈局存曳杖不妨呼小友還家
便恐見來孫林巒峻絕秋容瘦樓堞參差暮氣昏
酒美魚肥吾事畢一庵那得住雲根鮮于樞石橋
山留題詩旁通日月上星辰有路遙應接玉京仙
奕未終人物換秦鞭不到海波平當時混沌知誰
鑿他日崆峒強自名枯樹重榮事尤異欲從樵者
問長生朱彝尊冬日同鹿明府錢廣文游爛柯山

二十韻道書詮洞天青霞居第八流傳負薪翁披
榛入垞北中有兩青童棋聲暗相戛俄驚斧柯爛
逝節等奔鶻此事知有無特書在琳札我來太末
墟十月方納結曉出通仙門緣溪碎石滑拂林風
騷騷鳴碓水泚泚明府政不煩廣文俗能拔于焉
齊喚渡次第柅車轄飛梁忽在望相視咲且旦靈
境茲最奇造物亦太黠疑經百蟲焚或受五丁匿
連蜷虹霓偃垢膩神鬼刮傾崖穿一綫斷塔盤禿
鬪丹楓露已凋瑤草霜未殺剗苔讀遺碑汲井恣
拭刷昔賢鬬茶地昧者莫之察日斜洗行厨得食
鳥嘍嘍徘徊雙松
陰惆悵別香剎

鳳山 西安縣志在芝溪源距縣北八十里高五里

其上極平曠可治田圃

葉逢山 弘治衢州府志距城五十里上有盧杜二

禪師道場

王貴山 弘治衢州府志與烏巨相近舊傳貴乃質弟於此登仙

九龍山 西安縣志在靖安鄉去城二十里

響谷山 名勝志在縣南三十二里崖之半有石穴

風嘯則鳴

塘臺山 嘉靖浙江通志在縣東三十里

趙抃塘臺山詩直到

東峰最上頭旋磨崖石著詩留重
來特覺寒松老三十六年前舊遊

疊石山 弘治衢州府志在縣南四十里有巖穴名

仙遊洞

爵豆山 嘉靖浙江通志在縣南七十五里

雞鳴山 衢州府志在城東北十五里定陽溪流其
下上有塢曰雞鳴塢

烏巨山 方輿勝覽在縣東三十五里林木蒼蔚乃

信安精藍第一山

鷺籠山 名勝志在縣東五十里一名繡峰上有三

塢一池

紫微山 弘治衢州府志在縣東五十里一名迷茨

山中有懸崖泉滴不休

矜石山 弘治衢州府志在縣西二十里平地撐拔

五峰環以溪石

翠微山 崇禎衢州府志在仙巖秀峰之間高十餘

里

巖山 名勝志在城西十里四面壁立絕頂平曠略數十畝中有石井冬夏不竭

前霧山 舊浙江通志在臨江鄉去郡城三十里
烏石山 弘治衢州府志在湖山東距縣四十里巨石周匝若城之有石門中蓄水田歲未嘗旱

泉嶺山 舊浙江通志在縣東南一百里元豐九域志朱買臣云東越居保泉山一人守險萬人不得上是也

項山 名勝志在縣北四十里項羽廟在焉

金雞山 弘治衢州府志在縣北百里高可五里上有平坡昔有樵者於山得石如雞剖視之有金因名

鹿鳴山 西安縣志在縣西三里岡巒秀滌修竹蒼松掩映禪刹為郡人遊宴眺覽之所

銅山 舊浙江通志在縣西北百里宋時山出銅鉛錫今出礦前徽處州人羣聚取礦其後官兵蕩平

今設兵防守

狀元峰 西安縣志在縣北四十里其山尖峻與南

峰對

梧桐峰 弘治衢州府志在縣北七十里與紫微峰

相望號南北高峰或謂南北銀峰蓋南北銀場實

二峰支麓故也

悲思嶺 隋書地理志東陽郡信安縣有悲思嶺

余馬嶺 弘治衢州府志西距城十七里唐余將牧

馬處

銅錢嶺 舊浙江通志去郡城三里而遙

國朝康熙十三年耿逆之變官兵列營於此與賊對河而陣歷三年

王師雲集賊始大潰夜燒營壘而遁

仙巖 弘治衢州府志在縣東二十里中空可坐數十人寺在其側

小靈巖 弘治衢州府志在縣東二十五里橫山之

右山本培塿下有陰室如巖質石者因而深之旁有偃王祠

九仙巖 名勝志在縣東五十里狀如屏扆唐侍郎徐安貞隱此亦名侍郎巖

道巖 崇禎衢州府志俗名大巖縣東南三十里與九仙巖相望

朝陽洞 弘治衢州府志去芝溪五里洞門繞三尺其中石際水瀧深不能測紹興間邑令禱三洞取

石龜創三洞龍王廟聞於朝賜額靈澤今故宇無
存偶像移於龍寺

白塢洞 崇禎衢州府志在芝溪源去縣九十里口
狹內寬入時先以足第二層有龍潭深不可測日
夜水滴凝成白鷺管石宛似塢形故名士人採石
療痰疾風清月白時聞仙樂聲

井湖 西安縣志距縣東三十五里太平寺側長五
里餘廣百丈

彭湖 弘治衢州府志在縣東十五里俗傳有彭氏
竈下忽茁兩筍斲之流血已即大雨頃陷為湖廣
數百丈袤五里餘通石室水深不可測大旱不涸
民常禱此西安縣志今無此湖但溪中有灘絕陡
人號彭湖磯

東溪 弘治衢州府志按隋志名定陽溪源出紫微
山至石室下東北流合為信安溪

西溪 西安縣志距縣二里源出徽州祁門之百濟

嶺由開化常山縣流至城下又江山之水從仙霞
嶺過峽口紅橋渡歷江山至雙溪口與開化常山
溪合環城西以過而柘溪烏溪石碇溪馬廷溪儻
溪後溪之水皆匯焉為信安溪

穀溪 方輿勝覽出西安合江山常山之水輿地志
穀溪之水交錯如羅紋

互見龍游縣

龍游縣

龍丘山 龍游縣志在縣東四十里後漢書郡國志

東陽記太末龍丘山有九石特秀林表色丹白遠

望盡如蓮花龍丘長隱居於此因以為名其峰際

復有巖穴外如憲牖中有石牀

太平寰宇記山生龍鬚草檉柏望之

五采俗呼為新婦巖南齊書曰太末徐伯珍宅南九里有青山班固謂之九巖山

弘治衢

州府志又名九峰山山際有石壁百餘丈復有巖

名三疊唐徐安貞讀書其中

東華山 崇禎衢州府志在縣東二里下有姑蔑子

墓

岑山 衢州府志在縣西南十五里山有五峰如筆格名筆架山又名婺女照臺自金華望之正當其面故名

雞鳴山 龍游縣志在縣南三里宋嘉祐末邑人呂防講學於此有見雞鳴叢棘中羅得白金數十鎰輸之官而已不染後防三子皆貴人以為祥故名方山 弘治衢州府志在縣東四十里頂正平如古冠形

徐山 弘治衢州府志在縣南四十里今名靈山山
有徐偃王廟龍游縣志山東一石卓立曰香爐峰
山下有溪曰靈山港襍樹交映雲垂烟接

白石山 名勝志在縣南四十里山有圓石聳二十
餘丈其色純白唐初以白石名縣

大乘山 衢州府志在縣治北四十五里山接西安
縣界高一千四百丈有奇

白鶴山 萬厯龍游縣志去縣治四十里衢州府志

即豐去奢上昇處

楊樹山 萬厯龍游縣志去縣治西南八十里龍游

縣志疊嶂重巒上憂牛斗登其巔望兼川陸上有
五粒小松數株相傳楊盈川從華山移植後人因
以名山

杜山 龍游縣志在縣北四十五里峭壁長林疑無
入路

石壁山 舊浙江通志在縣東三十里

聖壇山 崇禎衢州府志在縣南三十里山勢聳拔

高五里登其巔可見數百里鳥道盤旋名十八曲

塢山 崇禎衢州府志在徐山下溪中孤嶼峙立四

水交流竹木掩映舟行望山上塢寺人物宛如畫

圖

三疊山 衢州府志在縣東三十里一名三疊巖上

有石室如層樓旁有石鼓擊之淵淵聲徹林杪中

有乳泉甚清冽

萬歷龍游縣志宋度宗常遣祭其神有泉出龍吻中

樓山 龍游縣志在縣南五十里隋書所載樓山即
此土人呼為五鳳樓

梅嶺 龍游縣志在縣北八十里名勝志稱宋建都
臨安時此嶺最為要道王微君日抄曰嘉隆時有
女郎名賦雪者從征過此題一絕云太末山多竹
似麻霧中雞犬幾人家此行探得春消息十里梅
花送鹿車今嶺與壽昌接界

赤津嶺 龍游縣志在治南七十里嶺崖峻隘為邑

中五嶺之一舊置有寨守此則枯蒼之寇不能北
下所謂五嶺者在南為赤津上塘在西南為小蓮
豪嶺在北為梅嶺是也

鸛鷺巖 弘治衢州府志在縣西五里梁時有異鳥
紫質五采羽族聚而隨之因以名下有潭深百尺
多巨魚

白佛巖 弘治衢州府志在縣北四十里廣五丈四
尺深四丈七尺巖中有佛堂地峻人跡罕至

湖巖 舊浙江通志在縣東十五里石巖橫截水面
其下深巖窈然半入水中深不見底上築浮圖塢
影松陰與水光上下相暎

五百人湖 名勝志在縣東北三十里按異苑昔有
五百人入此取魚先祈湖神丐水速竭至暮夢神
云竭湖當如禱若見異魚必毋殺或得銅缶亦勿
廢逮往決水得魚狀絕異遂羹之祭物猶在腹旋
得缶以為金又共廢之已而水暴長五百人俱沒

惟監督者免

穀溪

漢書地理志會稽太末有穀水東北至錢塘

入海

互見西安縣

弘治衢州府志出西安合江山常山

之水經縣之西團石潭匯於翠光巖下東流八十里入蘭溪界唐武德置穀州以此

汪似穀溪詩波紋端與穀紋同

正倚闌干想像中更被輕舸橫截去斜陽染出半江紅

團石潭

弘治衢州府志在縣西二十里有石出潭

上先是石峙旁岸孔世文洙南野史云團石圓出

狀元紹興十四年大水石因轉面視正圓明年劉
文靖公章果魁天下

常山縣

塢山 衢州府志在縣治左六十五步一名文筆峰
知縣蘇玘建塢其上

挂榜山 常山縣志在縣東五里山羅列如榜形故
名

三衢山 名勝志在縣北二十五里昔有洪水暴出

其支派分為三道故名州名亦取此

太平寰宇記
三衢山東陽

記云山上有石
周回三百步

常山

一名湖山

萬厯常山縣志在縣東三十里山頂有

田百餘畝湖廣數畝中有巨魚有石環繞如城故

縣以此名按東陽記云常山仙人採藥處高且神

白馬山

衢州府志在縣東四十里上有石如掌擎

一盤水流不息

紫竹山

常山縣志在縣北十五里萬山中一峰屹

起羣峰環擁

容車山 弘治衢州府志在縣北二十五里下有碧玉蓮花二洞山高三百丈迴環九百丈初鬻薪者每五鼓過之如聞梵唄聲後十年山破湧出一石僧跏趺坐立祠祀之扁曰石僧院

石門山 弘治衢州府志在縣北二十五里石徑僅容一人下臨大溪其巔有竅每旦有雲出其中東馳則雨西馳則晴驗之頗應

嚴谷山 弘治衢州府志在縣北三十八里石壁高
百餘丈山脇有洞流泉不絕山下嚴姓居焉故名
形弓山 舊浙江通志在縣西二十里石勢龍蟠溪
疇紫帶

硯山 崇禎衢州府志在縣南二十里出紫石作硯
禹明山 衢州府志在縣南二十五里宋時旱禱有
應因建廟於山麓

黃岡山 萬厯常山縣志在縣北三十里

西高峰 常山縣志在縣西昭慶寺後山尖秀聳為

縣治龍脈

賢良峰 弘治衢州府志在縣北一十五里秀聳如
筆宋王介讀書其下應賢良科第一因名

豸峰 弘治衢州府志在縣北二十里山石嵯峨狀
肖獬豸宋侍御江躋居其下故名

木棉嶺 衢州府志在縣南十里往江山之要路

石姆嶺 衢州府志在縣北十五里由輝山入巖口

丁村之路

趙公巖 萬厯常山縣志在縣東北二十五里捫蘿而登石洞可容百人趙清獻公讀書其下因以名

巖

張弼題公巖詩琴鶴久沈淪清風振無極巖前書帶草依然天水碧

桂巖 常山縣志在縣北二十里麻山之麓上有桂樹百餘株不種自生過秋花發風送清香數里

禹跡洞 弘治衢州府志在縣南五里中出泉溉田二百餘頃洞前石刻乃唐刺史陸仁燦述元祐初

郡守曹輔歲旱遣人汲泉於瓶有雲縈之少頃雨
大至郡以有年

攝龍洞 弘治衢州府志在縣北二十五里巾山
名勝志洞前石竇常乾禱雨則滲潤湏臾滿溢或
有異物如魚蝦之類與水注瓶而歸雲雨隨至及
送還洞口則瓶已空若攝而去故名

寶蓋洞 崇禎衢州府志在縣西五十里球川上正
德間姚源盜起戍此洞中有石乳懸如鐘磬擊之

有聲光彩閃爍若寶蓋然

白龍洞

名勝志在縣西一里許草木蒙密昔有白

龍乘大風雨凌虛而翔風休雨息視前蒙密處乃

有二洞一當山腹偃躬而入莫窮其奧一在山趾

澗溜潺潺有聲

徐以道白龍洞詩靈仙窟宅不多見車馬往來成再遊後洞白雲前

洞出上池紅葉下池流水花照眼明金鯉石髮藏春護玉虬邂逅尚青游子眼栖遲應白老僧頭

白石塢濠坑

崇禎衢州府志在七都正德七年立

寨戍守已卯宸濠作亂金華同知張齊寧波通判

王駕奉命守此

私溪 弘治衢州府志在縣南十里其源出開化境

東北流四十里與石硿溪會而為新開溪

雲林石硿衢州

常山縣思溪又地名石洪或云硿字石出水底側垂如鍾乳

儻溪 舊浙江通志在縣西北五里其源出玉山縣

界沿至縣北五里注於金川宋玉山令汪杞欲鑿
壠以通常山水道以工用不貲而罷

金川 常山縣志在縣北半里邑之水惟金川最大

其源出開化按信安志云昔有仙人飲此而吐金故名

球川 常山縣志在縣西五十里溪水清潔民多造紙

石碇溪 弘治衢州府志在縣南一里發源江山東流七十里與私溪合

新開溪 常山縣志在縣南一里乃私溪石碇二水所匯流出金川謂之三合水

江山縣

江郎山

弘治衢州府志在縣南五十里按文思博

要山有錦文三石峰俗傳有江姓兄弟三人登其

巔化為石因名山又有金純湏郎二名鄭緝之東

陽記金純山有三峰悉數百尺色丹奪目不可仰

視杜佑通典云湏郎山發地如筍有三峰

王禹偁江郎山

詩三茅遺躅在金陵又見江郎三弟兄謝眺門前
好山色一時分付與巖扃周雲叟江郎山詩巨靈
一夜劈山開三石推從天外來仙客斫開修月路
化工築作挽河臺李良年江郎山詩并序三石森

嚴可畏神所馮依宋政和間封祀侯爵豐碑剝落
猶可考舊傳江郎化石及頂有池蓮金鯽皆妄也
芳巖三峰異西看合翠屏吐雲殊冉冉插漢縱亭
亭華嶽差顏頤蓬萊尚杳冥野猿驚落臂高鳥過
揚翎早射扶桑赤全低玉洞青化來渾語怪隕處
莽疑星殛壓神湏倚匡持事可聽曾呵衆出隘實
使寇潛形姑蔑千旗偃仙霞一輪扁桓躬貽式序
蘋藻秩維馨俗拜江郎石碑鑱宋代銘巖程新減
戍猴火昨連陘陵谷原無易魚蓮漫不經探奇藤
笈遠避暍筍輿停想像撐孤樹蒼茫鑿五丁路旁
遺構肅丹
聖儼英靈

航埠山 江山縣志在縣東一里其陽有鹿溪航渡

故名

辛棄疾航埠山詩斷崖老樹互撐拄白水綠
畦相灌輸馬得溪南一邱壑放船盡作歸來

圖

西山 弘治衢州府志在縣西一里林木蒼蔚與縣

治相暎帶有泉曰清冷邑人多擇勝為亭榭

龍眠山 江山縣志在縣北十里高五丈周迴七里

俗名七里山蜿蜒屈盤故號龍眠

馬鞍山 嘉靖浙江通志在縣西十五里江山縣志

一在齊禮鄉

神仙山 江山縣志在縣東三十里泓泉在巔為禱

雨之所

景星山 弘治衢州府志在縣南五里高四十五丈
周迴五里本名突星紹興中令楊震易今名天啓
江山縣志按文思博要云山有三石峰後漢方士
趙炳過山下以鞭指之其石猶存

鶴鳴山 江山縣志在縣南二十五里山巔有泉不
涸

徐王山 弘治衢州府志在縣南相傳偃王駐兵處

鷲籠山 名勝志在縣東南四十里上有靈湫

騎石山 江山縣志在縣西二里高四十五丈周回

四里狀如人騎故名知縣余一龍改名步鰲

漸山 弘治衢州府志在縣東二十里俗號大靈山
巍然秀出上有偃王廟旁發泓泉三旱暵必禱

安定山 弘治衢州府志在縣東北二十里煙霏空
翠巘肩相高

湖山 天啓江山縣志在縣北二十五里上有石窟

深黑有龍居焉旱禱立雨山半有石城兩層城內有腴田泉水四時不竭

洗仙山 正德江山縣志在縣南四十里舊名泛青山昔有漁者見洞口有道人手招之不往道人旋揭巨石塞其門

聖堂山 江山縣志在縣南五十里頂有龍井旁有祠旱禱必應

觀星山 弘治衢州府志在縣南百里許高一百八

十丈為衆山之宗僧寶月結菴於此前有巨石常
飯虎

泉嶺山 江山縣志在縣南一百三十里周回數百

里通典漢朱買臣云東越王居保泉山即今信安

郡北界也

互見西
安縣

小江郎山 江山縣志在清湖峭石懸潭與浮橋映

帶儵魚翕聚宛然濠濮之間

浮蓋仙山 弘治衢州府志在縣南百里外上有仙

洞洞口石壇為禱所洞內石壁雙峙上通一罅徑畧容身可數十步始得曠處有仙人弈局泉竇冰滑餘石齒齒如屏如筍上有真紅桃花而不實

箬山 舊浙江通志在縣南百里高出仙霞之上霽景可望衢城

獨秀峰 嘉靖浙江通志在縣東南五十里高四十五丈秀色為諸峰之最

仙霞嶺 仙霞嶺志在縣南一百里高三百六十級

凡二十八曲長二十里宋史浩帥閩過此始募人

甃以石路

陸游過仙霞嶺詩吾生真是一枯蓬行遍人間路未窮暫聽朝鷄雙闕下又驂

羸馬萬山中重裘不敵晨霜力老木爭號夜谷風切切重尋散關夢朱顏頻改壯圖空高青度仙霞

嶺詩盡日度仙霞西風吹髻華乍寒拋白苧臨晚見黃花山陰全無路溪晴半是沙嶺雲逢宿處斜

月帶棲鴉徐涓早發仙霞嶺詩披衣陟崇岡日中下未已雄偉與兩都噴薄走千里百折翠隨人一

望寒生背高卑互無窮參差錯難理蔓草結層冰喬木懸秀藟畫餐就村肆小結依崖址去壑知幾

重剗竿引澗水回視高峽巔鳥飛不得比

窰嶺 衢州府志在仙霞北十五里

茶嶺 衢州府志在仙霞南三里

大竿嶺 崇禎衢州府志在縣南一百十里北趨婺

杭南通七閩西抵廣信遂為通途

小竿嶺 崇禎衢州府志在縣南一百三十里高一

百五十丈接福建浦城縣界

梨嶺

俗名五顯嶺

衢州府志在仙霞南五十六里

楓嶺 衢州府志小竿南五里為浙閩分界處

璩公嶺 崇禎衢州府志在縣南六十里路達枯蒼

紅旗嶺

弘治衢州府志在縣西三十五里路通玉

山縣

登真巖

正德江山縣志在縣西北十五里舊名筋

竹山詹妙容於此得仙唐別駕令狐峘易今名山

高五千尺中有潭溢則旱淺則豐唐刺史投金龍

以祈雨名為天泉

瀟巖

一名宵巖

江山縣志在彭村上下有二巖

白巖

弘治衢州府志在縣東四十五里山骨對下

如垂釵中有巖廣一丈深倍之衡袤三百弓規如

半月平曠可容十客瀑流從巔下如飛練

李處權游白巖

詩林梢過午未全分泉脈幽幽逗石根擬着籃輿訪絕頂共攜筇杖到青雲倘逢洞裏三株樹不羨人間萬石君許我陰崖結茅屋老於松竹尚殷勤

煙蘿洞 名勝志在縣南五里景星山之西可容二

十人怪石崛竒紺碧舊傳有煙蘿子隱焉

左坑洞 弘治衢州府志在縣北二十里巖洞六七

所有石佛石乳石田至者如聽龍吟虎嘯歲旱則

祈宋安定郡王趙令衿名其洞以顯應

青雲洞 弘治衢州府志在縣南二十五里中有龍

居乾道間里人鑿石偶得其穴蛻骨絕多

大嶺洞 正德江山縣志在縣西二十里懸石如屋

有石盤屈狀如龍下有石田炬而後入杳不可窮

張貴謨游大嶺洞詩石屋結藻井石
龍生玉鱗石田如可種願作洞中人

目連洞 舊浙江通志在縣西二里明淨幽曠如覆

石室瀑布聲響不絕舊傳阿目提連修行於此政

和間掘得青提夫人碑乃目連母也

大溪 衢州府志一名鹿溪亦曰鹿頭溪即古澱水
又名湏江漢志太末縣有澱水東北至錢塘入江
元和志澱水在湏江縣東南一里舊志源出仙霞
諸嶺匯流至清湖渡始通舟楫北逕城下又東北
十八里而為大溪灘舊有浮橋一名渡江頭為縣
境之衝要又東北入西安縣為衢港

文溪 弘治衢州府志在禮賢鎮之西發源有四一

自石鼓山一自廣源一自廣嶺永豐之後洋一自
枯蒼之半桃山至鎮匯為是溪

石魁潭 江山縣志在縣北二十五里巨石峙立如
魁故名

濟井潭 正德江山縣志在縣東南六十里方而深
外限橫石

雙溪泉 弘治衢州府志在縣市東側有雙溪堂及
竹溪為負邑佳處

湏女泉

一名梅花泉

天啓江山縣志在縣北三里發源

西山之麓深不及丈甘冽宜茗

瀑布泉 江山縣志在仙居寺右高數十丈懸崖傾

瀉狀如匹練

開化縣

鐘山 名勝志在縣北里許一名覆釜山金溪流其

下

塢山 弘治衢州府志在縣南一里昔學舍遷改不

常術者謂此山為文筆峰若建學與茲山對則文

盛果驗

魯貞瑤山詩天低雲有影日午樹無陰極目三秋望登高萬里心

獨山 開化縣志在縣南十里皇甫仙識云獨山員

出狀元獨山漾出宰相

金錢山 弘治開化縣志在縣東百步世傳金錢二

道人煉丹於此

蔚彥明金錢山詩亭亭金錢山地僻境逾靜不見煉藥人空遺石壇

井風動鶴唳清露重月光冷長嘯振枯木天風吹鬢影

臥佛山

一名玉屏山

弘治開化縣志在縣西七十步山

形如臥佛狀故名

笏山 開化縣志在縣西五里山形如笏

蟠桃山 弘治衢州府志在縣東北五里巖壁峻立

上平廣山徑縈紆處處種桃花時望之如蒸霞狀

蔚彥明題蟠桃山詩朝來煙霧深亭午始見天遠
近桃杏村高下出阪田飛湍激雷雨老樹藏雲烟

相逢荷鋤叟
疑是武陵仙

王母山 衢州府志在縣東十五里山高而銳山半

有靈湫俗謂之天井

鳳凰山 開化縣志在縣南一里如鳳展翅舊有置

麻車其下而去者其西南一帶又名麻車山

石耳山 弘治衢州府志在縣西八十里周回三百
里與婺源德興交界巖傍有井及池四時不竭開
化縣志石壁聳立嵌空如耳望彭蠡觀日出尤為
奇觀蓋南龍祖也

古田山 名勝志在縣西百里外高十五里中有田
可百畝田畔有龍湫侵晨有雲一縷浮空而出所

向輒雨

酒務山

衢州府志在縣北坦夷盤秀縣治奠之今

名華山

臺石山

名勝志在縣北十里高三十餘丈山之東

有臺石懸崖瞰溪嶺欲墮

天童八仙山

弘治開化縣志在縣北四十里周回

五里唐乾符間有仙人鄆去奢於山中修煉感天

童八仙降後得飛昇丹井猶存

鴉金嶺 弘治衢州府志在縣東二十五里周回五

十里抵常山界山勢壁立靈湫一泓在山之半

歇嶺 弘治衢州府志在縣西北七十里其路由白

沙抵德興界

百際嶺 衢州府志在縣北五十里與婺源縣接界

馬金嶺 弘治衢州府志在縣北九十里休寧縣界

芹嶺 遜嶺 弘治開化縣志在縣西南三十里高

十五里相連並高

雲霧巖 弘治開化縣志在縣北七十里廣七丈中有龍湫旱禱輒應

烏白二巖 名勝志在縣南十五里二巖對峙相去可二里

金溪 弘治衢州府志在縣東五十步凡兩源一出馬金嶺下經九里巒環石柱源一出際嶺下經嵩陽源俱達馬金合流曰馬金溪西南注四十里經鐘山下環縣治復東南流達華埠始容小舟入常

山境而溪漸大

馬廷溪 開化縣志在縣東十五里發源白馬山下
合大駛小駛二澗西南三十五里至常山境注於
金溪

聲口溪 弘治衢州府志在縣西瀑泉所集成溪
水聲如風雨

第一泉 開化縣志在縣西山下冬涸夏冽甘美特
異

義泉 開化縣志在縣東北百步廣僅十丈深不盈
仞泡湧如沸冬溫夏涼甘美不涸汲者相望故稱

浙江通志卷十八

欽定四庫全書

浙江通志卷十九

山川十一

嚴州府

建德縣
附郭

烏龍山

嚴陵志在府治北三里郡之鎮山也高六

百丈周回一百六十里宋宣和初臣僚建言龍為

君象山水地名有龍字當避乃改為仁安山明洪

武初號廣濟廟神為烏龍山神仍復今名

趙抃烏
龍山詩

泉石淙淙瀉百尋羣峰環翠起春林
危巔召雨雲先作不失蒼生望歲心

東山 嚴陵志在府治北一里烏龍山支脉下走平
陸繚入郡城各有其名此其一也

秀山 新定續志以秀亭得名西連東山

西山 新定續志在城內西北

道場山 建德縣志西連西山唐高僧陳尊宿嘗結
菴其上因名

建安山 嚴陵志在府治北一里秀山之東府城隍

廟在焉

建昌山 萬厯嚴州府志在府治西二里又名建蒼
山有順濟龍王廟下瞰江水左有西湖諸水皆出
於橋下

三雄山 太平寰宇記在縣治郡國志云山有石門
故關多牛馬跡在石上故也

界山 太平寰宇記在縣治郡國志云界山欲雨輒
聞鐘鼓之聲

錦沙岡 新定續志在城內北方正脉融結萃為郡治

東湖 建德縣志在興仁門內建德縣治左湖廣袤數十餘畝水自太平橋下遠江家塘直至西湖聖水池 明一統志在烏龍山巔池有二一清一濁俗謂之聖水歲旱禱雨多應

瀟灑園池 舊浙江通志在府治後

建德縣 城外山川

橘山 明一統志在府城南十里相傳上有羅浮橘

一株熟時風飄墜地得者詫為仙人橘

棋枰山 嚴陵志在縣南十五里山巔有石若棋枰

明山 巖山 舊浙江通志俱縣東南二十里

萬歲山 新定續志在縣東南二十里與明山巖山
相連巒秀環繞為山水佳處

馬目山 名勝志在縣西南二十五里一峰狀如馬

首中有小峰如目又名南高峰

陸游聽事望馬目
山詩官身早暮不

容間塵土堆胸愧滿顏也有向
人誇說處坐衙常對水南山

九峰山

嚴陵志在縣西五里上有九峰寺

趙抃九峰山詩

龍丘石室人難繼安正書堂世莫登
但見煙蘿最高處九峰排列一層層

羊亭山

萬歷嚴州府志在縣西八十里晉太傅羊

祐祠在焉

方門山

嚴陵志在縣東七里烏龍山之支也對峰

列嶂臨於江澚其狀若門故名

屯軍山

嚴陵志在縣西北一里相傳黃巢屯軍於

此

青山 嚴陵志在縣西十里四時蒼翠色蔭黛潭

平壁山 嚴陵志在縣西十里馬目山之支也千仞壁立因名

銅官山 萬厯嚴州府志在縣西八十里元豐九域志新安記云秦時於此置官採銅因名

高峰山 嚴陵志在縣東五里即北高峰烏龍山之支也雙峰聳秀林木清幽為一郡偉觀建德縣志

上有浮屠七級與南山天寧寺塔相望

南山 嚴陵志在縣南五里與城對峙馬目山之支也

蕙巖山 萬厯嚴州府志在縣西十五里

赤山 建德縣志在縣西北一里山無樹木土石殷然

龍門山 嚴陵志在縣東二十七里山巔累浮圖下瞰江渚有石壁飛瀑上連胥水下接嚴陵

幽徑山 名勝志在縣西四十里朱賈臣常寓此滌
硯於池後人因名為朱池

雲岫山 嚴陵志在縣東北四十里

湫山 嚴陵志在縣東北四十五里高六百丈周回
一百餘里與烏龍清冷二山相埒中有石湫俗呼
為聖水遇旱禱之輒應

尖山 新定續志在宣政鄉峰亦峭拔

吳氏山 嘉靖浙江通志在縣西北四十里山下有

吳村

義湖山

建德縣志在縣西四十里山有池大旱不

竭

焦山

嚴陵志在縣西五十里臨新安江澚

安仁山

建德縣志在縣東北六十里

蓮花山

嚴陵志在縣西五十里與楊溪峰相連狀

如蓮花故名

芝山

嚴陵志在縣東六十里桐廬縣清冷山之支

也與安仁相對下有芝水環之故名

靈巖山 巖陵志在縣西八十里與淳安紫蓋峰相連巖泉不竭遇旱禱之即雨

五寶山 新定續志在建德鄉西八十里五山共一源曰金山曰銀山曰銅山曰綠山曰鐵山

楊溪峰 萬厯嚴州府志在縣西四十五里如卓筆烏龍嶺 建德縣志在烏龍山側樵採從此過嶺

督潭嶺 萬厯嚴州府志在縣西二十三里下有督

潭又名鐘潭

午方嶺 明一統志在府城東北六十里以在烏龍山之南故名絕頂有金鷄窠石穴

新安江 萬歷嚴州府志在府城南一名歙江經淳安一帶又名青溪至城東二里合婺港又東入浙江

東陽江 舊浙江通志在府城東南二里來自金華與歙港合如丁字然

胥口江

一名建德江

建德縣志在縣東二十五里以伍

子胥經此因名

孟浩然宿建德江詩移舟泊煙渚日暮客愁新野曠天低樹江清月

近人

西湖

建德縣志在城西南和義門外廣袤五百四

十二丈中有寶華洲

桐溪

建德縣志在縣南十里自南高峰發源七里

至溪口

吳萬曆晚過桐溪詩桐溪一夜雨侵曉趁歸舟遠樹圍沙背寒煙簇市頭未忘泉石

癖不解稻粱謀此地堪終老行吟得小留

大洋溪 嚴陵志在縣南二十五里自馬目山發源
十五里至溪口

胥口溪 嚴陵志在縣東二十五里自胥嶺發源三
十里至胥口逆流十里達於胥口江

下涯溪 嚴陵志在縣西三十里自太周招賢橋東
北塢發源六十里至溪口

楊溪 嚴陵志在縣西四十里自蛇嶺發源五十里
至溪口

大郎灘 新定續志在縣東十里江南寧順廟顯應
妃長男倪惇募鄉兵決流感神兵不期而集風雨
震作廣決水道因號大郎灘

烏石灘 嚴陵志在縣東十五里以上二灘並在東
陽新安二江會流之下沿入桐廬縣界

玉泉 嚴陵志在府東北七里烏龍山麓昔人甃石
為瀑流如噴玉傍有石佛歲久漸長殆所謂息石
也

淳安縣

南山

一名青山

新定續志在溪南為縣治對山巖石層

繚林木陰翳有亭曰物外一邑奇觀也

仙壇山

隋書地理志遂安郡雉山縣有仙壇山

都督山

名勝志在縣南六十里相傳後漢方儼為

都督常駐兵處太平寰宇記都督山高峻臨江

邁山

嚴陵志在縣西北六里新安記云其山重疊

秀邁諸山故名

三鶴山 嚴陵志在縣南三十五里相傳昔有潘氏兄弟三人於此乘鶴上昇故名

羨山 嚴陵志在縣東三十五里山形甚峭拔其麓有數洞相連接外一洞有石龍水自龍口下注石盆中常滿不溢盆前有石果數品甚異遇旱請水於池輒雨

金鈎山 淳安縣志在縣東八里一名象鼻山

燕山 嘉靖浙江通志在縣東三十二里

東山 明一統志在縣東五十里絕頂有僧菴中祠

石佛

龜鶴山 嚴陵志在縣東五十里兩峰相值以形名

安樂山 明一統志在縣東六十五里山頂有泉及

石棋盤遇旱禱雨多應

重坑山 明一統志在縣東八十里山有二坑故名

雉山 嚴陵志在縣西南一里周回七里四十步新

安記云郡西南渡水一里餘有山如雉蹲因名隋

時常取以名縣

靈巖山 巖陵志在縣東北六里周回十三里舊名

龍山吳永安五年黃龍見於此因名唐元和元年觀

察使牒改靈巖山宋時方逢辰舍其下更號蛟峰

蕉山 名勝志在縣東北三十八里山分八面水注于

派淳安縣志昔有人植蕉故名

岐山 萬厯嚴州府志在縣東北九十里石門徑內

吳山 淳安縣志在縣東北一百里上有仙姑洞子

胥祠三寶石五蓮峰與杭之吳山相類因名

聖姥山 淳安縣志在縣東南二十五里山巔有平

地餘一頃洞泉冬夏不竭祈禱輒應

密山

嘉靖浙江通志在縣東南五十里

程嘉燧發
淳安記密

山諸巖自淳安縣而下溪澗可四五里兩巖若顏
岸高一二丈或時有小山臨岸遠者去數里蓋東
平水舒曠如也凡若干里而見兩山如闕溪迴入
其間舟行匯中其右一山崖石嶙峋苔繡丹碧如
霞峰首甚翠偉其後數峰溪流擁之從絕頂墮一
峰浣溪溪有廟踞其上下為澄潭曰羅山潭馬石
廟在焉廟前有石如馬藤蘿冒其上不知為何神
也入若千里而為合溪浦有山壁立綿亘如城石

半作鐵色其將盡一峰皴丈其五采時方豈鋪坐
於間觀潭水如展鏡沒濯峰趾倒影沈碧菖蒲藤
樹披拂涯溪悠然歷之疑非人間也溪稍折而右
其左一峰高數仞皴理與前埒而多草樹半叢石
辨間形正圓如月半出水上最奇其下復有密山
巖巖巖然嵌空其高可數百仞山形亞缺如朽株
其埋背衡旋舟徐移其下山勢側出凹凸亦異狀
中稍斷為壑按山形如堂者曰密豈窪缺處形肖
堂室與具石大都九裂水拆參錯骨立或瑣碎攢
聚如鳥獸器物之形者不可勝計時微雨自遠至
過乳香潭潭壁亦奇
麗晦冥不可辨矣

並桃山 新定續志跨常樂永平兩鄉登絕頂杭欽
衢婺之山依約在目山下望之如二桃因名

南來山 明一統志在縣西北一百三十里山勢自北而南故名

東泉山 萬厯嚴州府志在縣東北一百三十里舊名覆船其一支南出為紫瑞峰當龍池之上望之如青芙蓉出泉三派並東注唐改今名

小金山 嚴陵志在縣西十里竝立大溪中上有佛宇有似鎮江之金山而小故名

鄭玉小金山記新安江東流三百里

為淳安縣未至縣十里江心茲山在焉古樹蕭然出煙蒼水黃間石色峻增苔蘚如繡上有佛寺歲

久頽圯傍一石出灘瀨中如龜形溯流而上號龜
石灘去錦沙村纔一二里燕石崖相對峙若樓閣
飛簾出臨水上蓋一縣山川之勝聚會於此胡朝
顓小金山詩天光嵐影碧相涵百頃玻瓈一望間
綠水繞門逌客渡白雲終日伴僧閒疎鐘破曉潛
虬動老木成陰倦鳥還喚取頭陀磨石壁為渠題
作小金山

響山 名勝志在縣西十八里石壁如削下有深潭
頽洞舟人呼之其響相應

尹山 嘉靖浙江通志在縣西南七十里兩峰南峙
跨石如橋倚石如人中有石室石棋皆天然之勝

也

擔鹽山 嚴陵志在縣西北一百一十里相傳錢鏐
微時常販鹽經此因苦渴以拄杖觸巖泉忽涌出
後人因名其山

雲濛山 名勝志在縣南三十里高五百丈周回七
十里天欲雨則雲霧滃騰山頂

芝山 名勝志在縣南六十里商文毅公家於此
百桂山 淳安縣志在縣西七十里香桂叢生

蜀阜山

名勝志在縣西六十五里以其山似蜀三

峽故名

鳳山

嘉靖浙江通志山有二一在縣西北一在縣

東北

金紫峰

嚴陵志在縣東北八十里高二十餘丈中

峰有圓石起數十丈光瑩無草木其旁兩峰若俯

每旭日照灼則有金紫閃爍之色上有九隴瀑布

魚口峰

淳安縣志在縣西十五里當儒學櫺星門

之前

虎峰 舊浙江通志在縣東北二十五里渡市相傳
方仙翁儲與弟忠烈侯儼常隱此

梅花峰 明一統志在縣南三十里望之如梅花五
出

紫蓋峰 新定續志在安福鄉山腰微瘦上乃旁拓
形如擁蓋因以為名

銅嶺 嚴陵志在縣東七十里中有石洞出泉又有

田號曰仙人田

遼嶺 嚴陵志在縣南七十五里乃壽淳二邑限隔
之地懸崖絕壁無路可通舊惟水中往來成化間
知府朱暄通判劉永寬命工修砌遂成坦途其有
不可椎鑿者悉為橋以濟之行旅多賴焉

登雲嶺

一名黃泥嶺

淳安縣志在縣西北六十里永平

鄉之蜀阜

西嶺 舊浙江通志在縣治南八十里亦與壽昌接

境在玳瑁之西故名

方壺嶺 淳安縣志在縣西七十里御史王賓出入於此更名驄馬嶺

燕石巖 明一統志在縣西一十五里穹然如石屋可坐數人俗呼積甲山

保安巖 明一統志在縣東北六十里一名玉笋峰側視如圭正視如筆

小溪巖 淳安縣志在縣東六十里怪石巉巖水陸

俱險明嘉靖間知縣洪英明立錦溪關於此以禦
礦寇

仙居洞 名勝志在縣東三十五里羨山連接十數
洞皆一竅相通最外一洞狀如龍蟠中有石座座
有石盆龍口水下溢盆中

靈巖洞 巖陵志在縣東五十里青溪鄉千仞里里
東諸山一峰特高號千仞峰下有兩水源東曰聰
明西曰龍門其源下又分二洞一曰龍泓一曰均

濟各溉田數頃宋時邑人邵晃讀書於此其子炳
兄弟復建室洞側隱居焉元祐中通判殿中丞楊
備行縣訪之名其洞曰靈巖

仙女洞 明一統志在縣東北六十里洞口有祠每
歲旱禱之則環山皆雨不及他境

威平洞 嚴陵志在縣西七十里一名清溪洞一名
幫源洞宋宣和中方臘反韓世忠擊敗之窮追至
此洞賊深據巖屋為三窟諸將莫知所入世忠乃

潛行溪谷間問野婦得徑即挺身仗戈擣其穴擒
臘以出賊平改今名

鶴迹石 嚴陵志在縣東北一十五里石高五丈許
上有鶴迹長徑尺餘傍有馬虎迹相傳方儲兄弟
三人各乘一物游此其跡天然非鐫刻所及

魁星石 明一統志在縣東北五十里俗傳星隕所
化

青溪 舊浙江通志一名新安江西出於歙環統於

縣之前東注於嚴東南入於海

李白青溪詩青溪清我心水色異諸

水借問新安江見底何如此人行明鏡中鳥度屏風裏向晚猩猩啼空悲遠遊子章八元新安江行詩江源南出永野渡暫維梢古戍懸魚網空林露鳥巢雪晴山脊見沙淺浪文交自笑無媒者逢人

作解

進賢溪 名勝志在縣東北二十五里漢尚書令方

儲晉尚書方操唐隱士方干宋校理方恪最為顯

著故鄉里市渡皆曰進賢溪因以名

軒駐溪 明一統志在縣東五十里相傳漢方儲乘

鶴至此登舟故名

三潭 嚴陵志在縣西一百里崇岡僻嶠極深處源
出昱嶺瀦為三潭高下相比上者可一畝中者尤
大其下則差小常有輪麻縷縋石下測之者盡一
輪莫竟其底旁有石山斜瞰潭上

九里灣潭 舊浙江通志在虎石潭下

響山潭 淳安縣志在響山之下往來過者必停舟
歌呼為響聲相答

長潭 舊浙江通志在黃江潭下萬花谷口

雉山潭 萬曆嚴州府志在縣南一里

懸藤灘 舊浙江通志岸有二石臨灘上

桐廬縣

安樂山 嚴陵志在縣北一里縣以此山為主而差

低於鳳凰山宋時邑人羅彥昇建塔以鎮之高七

級元末張士誠遣劉真據桐廬拆磚石他用塔遂

毀

國朝康熙十一年重建

桐君山 嚴陵志在縣治東二里突然一峰下瞰兩

江相傳山側舊有桐樹枝柯蔭蔽數畝嘗有異人

採藥於此結廬樹下或問其姓則指桐以示之因

號為桐君山因以名

徐舫桐君山詩古昔有仙君結廬憩桐木問姓即指桐採

藥秘仙錄黃唐或禮樂蜀云邈空谷接迹巢許儔曠志仰乘鹿翮葉為製衣松苓聊自服山中諒不

死時有飛來鵲于欲訪仙踪雲深不可躅

鳳皇山 名勝志在縣東二里下瞰桐江

戴山 嚴陵志在縣東二里劉宋時戴顓隱此故名

梓芳山 嚴陵志在縣東六里本名紙芳後人訛傳

梓芳數峰連接或伏或起皆西上以迎桐君

舞象山 萬厯嚴州府志在縣西二里因形得名

常山 名勝志在縣西五里晉許邁曾隱此

牛山 嚴陵志在縣西五里路當驛道上通閩廣下

接杭越內逼山外瞰江崎嶇屈曲凡十有五里宋

淳熙己亥邑令趙伯庸向雲丞等憫行人多致顛

陸於是沿江一帶設扶欄七百行者便之元末劉
真取石柱築城扶欄遂廢

金雞山 桐廬縣志在縣西十里前臨大江

富春山 舊浙江通志在縣西四十里前臨大江上

有東西二臺一名嚴陵山清麗奇絕號錦峰繡嶺
乃子陵釣處

謹按後漢書嚴光傳耕於富春山沈約宋書吳時
分富春之地置桐廬縣則嚴陵山即所耕富春山
無疑

新婦山 嘉靖浙江通志在縣西北八里前臨江水

尖山 桐廬縣志在縣西北十五里一峰秀銳竄出

江上

靈山 桐廬縣志在縣西北四十五里孤峰峻拔陟其頂可見杭城相傳白鶴真人煉丹於此絕頂有

龍池上有巖人鑿石為真人像

香爐山 舊浙江通志在縣西北二十五里

龍角山 桐廬縣志在縣西北三十里其山高聳如

龍角故名

法華山 嚴陵志在縣西北二十五里相傳昔時高僧曇翼戒行孤高挂錫松下日誦法華經感羣鳥聚聽因名

羅峰山 舊浙江通志在縣西北三十里

風穴山 桐廬縣志在縣西北四十里山下有穴常出風

藍田山 楊維禎三一精舍記山去桐江北三十里

北負鍾阜與周顒隱居伊邇其香爐峭壁紫煙瀑
布如白龍蜿蜒掉尾雲際

龍蟠山 名勝志在縣西北四十五里山頂有石曰
虎嬉登之可見錢塘城郭

龍洞山 新定續志在常樂鄉行羊腸半舍許有石
洞曰龍門中乃夷曠廣法寺居之山巔有龍門池流
水溉田足以供僧

環翠山 嚴陵志在縣西北二十五里相傳晉時郭

文常隱於此山上有仙碁石

清冷山 名勝志在縣西北三十里高五千餘仞周
七十里有洞一穴四面出泉溉田五千餘頃宋時
常遣使醮祭

鐘山 舊浙江通志在縣西北四十里其形似鐘鄉
以是名晉周顒隱金陵之鍾山後出為海鹽令會
稽孔稚圭作北山移文因為所誚乃卜居於此

石柱山 桐廬縣志在縣西北四十五里絕頂有巨

石高十餘丈濶一丈遠望如柱故名

鷄籠山

桐廬縣志在縣西北五十里側有佛印洞

下有城門洞

龍潭山

嚴陵志在縣南十里上有龍潭禱雨多應

大奇山

桐廬縣志在縣南十里頂有泉舊名寨基

山

歌舞山

金牛山

舊浙江通志俱縣南一十五里

侍郎山

舊浙江通志在縣東南二十五里上有胡

寅侍郎廟故名

香泉山 嘉靖浙江通志在縣東南二十五里側有

仙姑巖

烏石山 嚴陵志在縣東南四十五里漢末孫鍾種

瓜於此有三異人為塋其祖墓塋畢化為三白鶴
飛去故又名白鶴峰

獨高峰 桐廬縣志在縣西北二十里突出江表獨

高於衆山因名山上有井昔中峰禪師住錫於此

小嶺 桐廬縣志在縣北一里鍾山桐廬鄉之要道
也上有碧雲菴

娘嶺 舊浙江通志在縣西北二十里上通金衢下
通省直

白峰嶺 嚴陵志在縣東北三十里嶺西有舖達新
城縣

周顥嶺 嚴陵志在縣西北四十五里相傳周顥隱
焉

桃嶺 嚴陵志在縣東南七十里東至狐野嶺浦江

界

白霧巖 新定續志在桐廬鄉山最高將雨先霧

老鷹巖 桐廬縣志在縣西四十里巖有路瀕江傾

隘峻嶮纜舟之人多有顛躓成化間同知張昇命
工琢巖砌石而其險猶存

閩仙洞 嚴陵志在高山相傳昔有仙人居其中有

石闕入闕十步許曲折而東忽曠然空明藤蘿交

加葱蒨可愛其北乃洞也迴環二十餘丈巖間石乳溜滴不竭

瑶林洞 巖陵志在縣西北四十五里洞口濶二丈

許梯級而下百丈餘壁有五采泉有八音犬吠人

語可驚可怪蓋神仙遊集之所也

徐舫瑶林洞詩洞傳猴嶺似仿

佛玉笙清石或藏漁鼓雲猶隔犬聲乍居人頗怪異聽耳初驚子晉壺天有無疑彩鳳鳴

垂雲洞 名勝志在縣西北五十里可容百人以上有

穴見天光傍有石稜萬片狀如晴雲亂墜上多石

佛舊名石佛洞唐貞元間改今名

桐源洞 桐廬縣志在縣西北三十五里嘉靖時樵者數聞音樂在藤蘿間遂從而斧之去其壅蔽內有洞高十餘丈并石龍石鳳石球石柱石塔石牀蓮花石座之類

館仙洞 嚴陵志在縣西北五十里自洞門梯級而下三丈餘有石壁自壁側入十餘步洞屋高敞乳竇涓滴凝成石柱石塔石馬石龍之類自是縈迂

曲折而入莫知所窮相傳內有蟾蜍翠鵲壁間多名賢題志原名赤洲洞唐貞元殿中侍御史李士舉來游改今名

桐江 嚴陵志在縣南六十步其源有三一出徽州

一出衢州一出金華三水合而東北遠注九十里

至縣郭之南曰桐江東流歷富陽是謂浙江以入

於海江岸山巒峭峻其水深渟若黛

王禕桐江舟中詩瀟灑溪

山夢此邦輕風細雨過桐江川迴幾訝船無路林缺時看屋有窻野果青苞垂箇箇水禽白羽去雙

雙到家已值重陽節
新釀村醅正滿缸

桐溪

一名橫港一
名分水港

名勝志源出天目山經於潛東

流六十里入桐江太平寰宇記桐溪一名紫溪水

木泉石相映名樓林自桐溪至於潛有九十六瀨

第二即嚴陵瀨也

陸游自東津汎舟至桐溪詩潮
生東西津雨暗上下塔蕭蕭亂

菰蒲拍拍起鳬鴨吾船雖甚小尚可著一榻高枕
墮紗帽溪風吹醉頰南山浮濕翠偃蹇呼不容安

得青蓮公傑
句為彈壓

窄溪 嚴陵志在縣東南三十里乃甘溪之下流由

前村衆善院北分派東流十三里入於江名窄溪
埠與新城港相對

蘆茨溪 嚴陵志在縣西南四十里有大小二源山
皆壁立一出紫洲一出西坑嶺至端平橋合流入
江

白雲源 嚴陵志在縣西南四十里一名蘆茨源重
山插天林麓茂盛鄉民採薪為炭供數州蒸爨之
用名山勝槩記白雲源與釣臺對乃唐處士方干

之舊隱也

屏風源 嚴陵志在縣東南四十五里上有龍潭其
泉自石罅中涌出外有山對峙鈴鎖其中濶五里
許識者謂築其喉以積水則深澳一帶可以無旱
桐洲 嚴陵志在縣東三十五里袤二十里南臨大
江北有後港以富陽趙家灘為界相傳桐君種藥
於此故名

七里灘 嚴陵志在縣西四十五里與嚴陵瀨相接

兩山夾峙水駛如箭諺云有風七里無風七十里

蓋舟行艱於牽挽惟視風以為遲速

避者錄話嚴陵七里瀨兩

山聳起壁立連亘七里土人謂之龍訛為龍籠本
音閩江反奔湍貌以為若龍謬也七里之間皆難
瀨今因沈約詩誤為一名非是謝靈運七里瀨詩
一瞬即七里箭馳猶是難牆邊走嵐翠枕底失風
湍但訝猿鳥定不知霜月寒前賢竟何益此地誤
垂竿潘亨七里灘詩怒濤催遠客帆落釣臺陰夜
雨他鄉夢秋風何處砧渚煙籠樹杪澗水入溪深
中有垂綸者茫茫不可尋冀尚等七里瀨和康樂
韻詩崇臺雖謝登紆嶺正延眺攬衆恣綠沿參複
改岑峭岸曲失前渚陰多翳晨耀巨石峙迴渚鐘
谿互吞浦層房或山椒歌側吐清妙運開蟠穉先
智寓要領誚加腹酬英游夾鼎繫綸釣逝矣璜溪

載詎諧
客星調

漏港灘

嚴陵志在縣西有上漏港下漏港二灘

鮮

樞過桐廬漏港灘示舟人詩驚流激長灘百折怒
未已篙師與水爭退尺進纔咫技窮解衣下力排
過乃止維時春冬交冰雪寒墮指我時卧舟
中起眎頗有泚迂疎一何補辛苦媿舟子

嚴陵瀨

嚴陵志在縣西三十五里釣臺下按子陵

本傳云耕於富春山後人名其釣處為嚴陵瀨

十九泉

嚴陵志在縣西三十五里釣臺下甚甘美

陸羽茶經品第天下水味以此泉居第十九故名

遂安縣

五獅山

嚴陵志在縣治後五山聯屬形如獅故名

婺山

新定續志在縣東南二里許孤峰峭立為一

邑望紹興中有避地者李季精天文謂二浙上當
牛女之分今婺州與徽之婺源縣皆以女宿得名
此邑介其中宜曰婺山作霧非也

仁山

名勝志在縣北五里其巔有池注為瀑布

義山

萬厯遂安縣志在縣西五里

白石山 萬厯嚴州府志在縣西七里元和郡縣志
其山出白石英因以為名

語石山 舊浙江通志在縣西五里天啓間鴻臚姜
習孔搜奇剔石洞壑玲瓏彷彿飛來紫陽

純和山 名勝志在縣西十里有仙人橋

巖山 遂安縣志在縣北十里其巔有井大旱不竭
高柏山 遂安縣志在縣西二十里

碧梢山 舊浙江通志在縣東十五里遙截下流屹

然華表下有碧梢塢

靈巖山 方輿勝覽在縣北十五里上有泉分注三井湓為瀑布二百尺許

織女山 晏公類要在縣西南一十里山有織女祠

金紫山 萬厯嚴州府志在縣北二十里為縣鎮山

公山 嚴陵志在縣西四十里四面環拱此山獨高

故尊之曰公山按圖經載郡國志所紀公山云山出水水有槁自然泛來行人嗽之恣飽食則可將

去則病樂史以為在建德境內今建德不聞有此山疑即此公山也

愚公山 遂安縣志在縣西三十里特聳如翁故名
霞山 遂安縣志在縣西四十里丹崖返照遙望如霞

瀛山 舊浙江通志在縣西北四十里周令恪建書院其上為朱子與詹儀之講學處

花果山 嚴陵志在縣西北四十五里相傳古有僧

化身於此因建庵焉居者不種蔬但焚其地而鋤
之則蔓菁之類自出

七峰山 萬厯嚴州府志在縣西南四十里從隆奇
秀為諸山冠

龍耳山 萬厯遂安縣志在縣西六十里舊名兔耳
山新安記云有兩峰直上如兔耳有神號大姥夫
人祈禱皆應若寇至土人能勝之則神鼓先鳴唐
天寶六載改今名

高喬山 萬厯遂安縣志在縣西六十五里開化界
層峰峭削旁若迂迴正德癸酉流賊踐開化之馬
金去界不十里縣令容九霄築寨於此以遏其衝
境遂以完

雲濛山 萬厯遂安縣志在縣北五十里與梓樹塢
相屬

武強山 嚴陵志在縣西南五十里山極險峻鄉民
常保焉盜不能攻故名

洪洞山 明一統志在縣西南七十里唐時置場於此採銅久廢

許由山 名勝志在縣東十里宋朱子訪詹儀之於此至今目為朱墩

長垓山 萬厯遂安縣志在縣西五里兩山壁立道狹多阻元末高指揮過紅巾於此

黃連嶺 晏公類要在縣南七十里山路險阻行人渡嶺者皆口苦如咀黃連

楊嶺 嚴陵志在縣東北四十里通淳安界

安礪嶺 萬厯嚴州府志在縣東北四十里

猥嶺 嚴陵志在縣南五十里

佛嶺 嚴陵志在縣西南四十里通淳安界

積雪嶺 萬厯嚴州府志在縣西八十里冬春積雪

不消故名

馬金嶺 嚴陵志在縣西南八十里通開化界

歙嶺 遂安縣志在縣西北七十里

白滌嶺

遂安縣志在縣西九十里通休寧界

靈巖洞

嚴陵志在縣西北十五里巖上有泉自山

巔石罅中流出為小澗石壁上瀑布二百尺秋冬
不竭宋宣和元年歲旱禱之龍見而雨乃建祠以
奉焉

乳洞

名勝志在縣南八十里洞口廣三丈許其中

出泉大旱不涸

幞頭石

嚴陵志在縣南八十里屹然臨水高十丈

廣八丈形似故名

石柱 名勝志在縣南八十里聳立山足高數丈圍
丈餘

石船 名勝志在縣南八十里長四丈卧水中如船
尾懸一石如舵

武強溪 萬厯遂安縣志在縣西源出武強山下達
於縣治統郭之南復東注四十里入淳安境又二
十里入新安江

龍溪

嚴陵志在縣東北自淳安縣境發源南流至

縣東南一里許入武強溪

百丈漈

萬厯遂安縣志在縣西五十里霞源山上

臨崖有三石池瀉作瀑布百餘丈下有叢石激水

聲振巖谷

石下潭

萬厯嚴州府志在縣東二里

漾井

遂安縣志在縣南八十里一名米井泉水湧

出大旱不涸溉田數百畝

壽昌縣

萬松山 嚴陵志在縣北八十步山皆髯松蒼翠可愛近市而不囂足以遊目騁懷焉

青龍山 新定續志在縣東一里縣治來岡分逶迤通衢出臨父溪勢若昂首

馬鞍山 壽昌縣志在縣東南三里兩峰突起中連平岡如馬鞍故名

石鼓山 嚴陵志在縣東南七里山有石每歲穀日

扣之鳴則其年豐稔候之有驗

彭頭山

嚴陵志在縣西湖之東晴波倒影上下

一色雖密邇市廛清絕夔異

默山

嚴陵志在縣西南二里峯巒環拱

仙池山

壽昌縣志在縣南三里一名南山其上有

池真人卜景雲煉丹處也

鄭山

壽昌縣志在縣南五里

天井山

嘉靖浙江通志在縣南十里太平寰宇記

輿地志云壽昌縣有天井山天將降雨頂上輒有鐘鼓之聲

下馬山 萬厯壽昌縣志在縣西五里峯巒綿亘湧出平阪宋直龍圖閣葉三省既貴顯每歸鄉邑望此必下馬徒行鄉人服其恭謹故以名山

玉華山 萬厯壽昌縣志在縣東南二十里巖崖竒削高數百丈其色映空如玉

烏石山 壽昌縣志在縣南十五里山石多黑

泉山 壽昌縣志在縣南二十五里有泉分四道而
下冬夏不竭

金臺山 名勝志在縣南十五里山峯如露臺日色
臨照其上

冠山 壽昌縣志在金臺之南壁立萬仞中有洞洞
有冠山洞主像

岑山 嚴陵志在縣東二十里孤峯峭立麓有石室
可容數人宋國子監丞鄭彥常構書院遺址猶存

密山 壽昌縣志在縣北五里怪石崔嵬人莫能至

巖山 壽昌縣志在縣北六里山頂有石回抱如負

辰狀

過浴山 嚴陵志在縣北十八里下有洞相傳昔有

仙人過此浴故名

葉養蒙過浴洞詩過浴洞泉涓涓丹崖無路難覓綠松下何須

問童子山中即此求神仙我來弔古訪陳迹刮袂清風秋瑟瑟白羊喫盡巨勝花不遇初平化為石

屏風山 貝瓊翠屏軒記壽昌茗塘東北一山却立

千仞曰屏風山

燕山 晏公類要在縣西北二十里每遇亢暘有煙霧橫其上羣燕翔集即雨故名

青山 名勝志在縣西十里

錢師山 舊浙江通志在縣西南四十五里山頂有嶺名曰石郭嶺上多平地崖石嵯峨水泉滴瀝與衢州西安接境

巖洞山 嚴陵志在縣東南三十里山有五峰一曰華蓋二曰羅帽三曰玉露四曰慶雲五曰景星五

峰之中華蓋最高常有雲霧罩其上山南屬金華

山北屬嚴州實為二郡之鎮

卜儀可巖洞山詩巖鳴風落日山納晚歸

雲借問林下翁
清幽與誰分

西山 壽昌縣志在縣東十五里山形奇秀右襟淤

竭左帶芳溪

赤孤山 名勝志在縣東二十里有石赭色壁立孤

峻

硯山 嚴陵志在縣南三十里山南屬金華北屬嚴

州西屬衢州實為三州之界

天湖山 名勝志在縣西二十里上有池流下溉田

藥山 名勝志在縣西三十里山半有藥泉

魏馱山

嚴陵志在縣西四十里

李頻及第後還家過嶺詩魏馱山前

一朵花嶺西更有幾千家石斑魚鮓香衝鼻淺水沙田飯遶牙

四靈山

名勝志在縣西四十里四山拱揖相向形

肖麟鳳龜龍宋葉樞密義問故居在焉

塘山 壽昌縣志在縣西五十里石徑屈曲上有二

池

朱山 舊浙江通志在縣西六十里

金姑峰 壽昌縣志在縣東三里峰尖峭拔卓立其

麓若鳳翅截縣之水口正艮峰也

長嶺 壽昌縣志在縣東南二十五里東通金衢西

達宣歙

葉養蒙長嶺詩長嶺頭倦行役鷓鴣啼罷秋煙濕斷碑無字生土花青松落陰滿苔

石節節級級如登梯凭高一覽青天低笑隨猿鶴不知遠但見日落西山西

梅嶺 嚴陵志在縣西南四十里與龍游接境宋都

臨安凡江西閩廣荆湖雲貴八番海外諸國來者皆道其下今取道蘭溪非宋時驛路也

遼嶺 嚴陵志在縣西北五十里嶺半有小亭為登臨憩息之所其北接淳安界

大慈巖 嚴陵志在縣南二十里其巖穹然如屋東有一石竅僅可容人曲身以入為梯三級可憑而下有石室曰觀音洞歲旱禱雨必應巖之西北可一里許又有石洞扳蘿乃可得入中有石筍從地

涌出元大德間臨安人莫子淵棄家學道至此見
其奇秀遂琢石筍為石佛號大慈巖因留居焉其
巖望金衢二州之景一覽可徧

高湖巖 嚴陵志在縣東南二十五里山巔一平如
掌四畔多巖石惟一徑可通

金雞巖 明一統志在縣西六十里昔有異人過此
聞石中有雞聲剖石得一物如雞有金色石竅今
存

寶公巖

嚴陵志在縣西六十里巖壁絕險相傳昔

有烈士常居此巖出入設危鉤以渡之有人見其
負一牛犢入巖後不復出至今時聞音樂聲

南山洞

嚴陵志在縣西三十里洞上有三門屈曲

旁通嵯峨突兀清楚可愛

靈栖洞

嚴陵志在縣西四十里洞極深深邃盛夏人

或持火而入至其深處寒不可禦洞中水常泛溢

有魚躍出

嚴州府志唐有縣令穆君來遊愛其幽勝微吟云一逕入雙厓初疑有幾家行

窮人不見坐久日空斜時李頻從行因繼云石上生靈草泉中落異花終須茅結屋向北學餐霞穆

加深賞

西湖 嚴陵志在縣西廣袤二百四十步有飛橋跨

其上唐景福二年縣令戴筠開

詳見水利胡楚村壽昌西湖詩天光

澄淡水光浮此景分明畫作秋白鷺鷺翹荷葉下紅蜻蜒立葦梢頭垂竿漁父坐幽石採芰女兒撐小舟西畔民居應笑我太平時節此間游

艾溪 新定續志發源自縣西雞籠山過縣東七里

為淤竭溪又東為湖神溪實一源也至艾塘入建

德縣界達於新安江

淤竭溪 萬歷壽昌縣志在縣東七里承艾溪之水
至桂村與協儒溪合流至翠溪口與翠溪合流

壽昌溪 嚴陵志在縣西六十里舊志云大溪源自
雞籠山東南流經邑村與交溪合流曰大同溪又
東注過縣西曰艾溪遶南而東過白沙曰淤竭溪
又東北注曰湖神溪實一源也流長九十里出壽
昌港口統蒼山入新安江

新市潭 萬厯嚴州府志在縣東十五里嚴陵志南
宋都杭此地經行者衆有葉氏百餘家聚居其旁
新列市肆故名

分水縣

雙峰山 新定續志在縣北縣治依為主山

玉華山 嚴陵志在縣北山下有泉如玉色故名

天祿山 嘉靖浙江通志在縣北十里印渚統其下

慶雲山

一名五雲山

嚴陵志在縣東南二百五十步唐

長慶三年有五色雲見因名

塔山

嚴陵志在縣東上有塔院

中臺山

分水縣志在縣東十里

石柱山

名勝志在縣南二十里山有石柱狀如削成

紫羅山

嚴陵志在縣東十五里

峭山

分水縣志在縣東五十里峰巒高峻約千餘丈

石壁山

萬厯嚴州府志在縣東五十里有洞如室

旁皆石壁故名

石筍山 嘉靖浙江通志在縣北四十五里

秦遊山 嚴陵志在縣東十七里相傳始皇遊天目

山庶民於此山覲見因名叅秦山唐改今名

鍾山 分水縣志在縣西五十里有泉自洞出俗名

仙洞

覺道山 分水縣志在縣西三十五里太平寰宇記

分水縣覺道山上昔有二人入山得道不知所終

石壁留二人影如道士狀晴日視之宛然

紫龍山

新定續志在縣南二十里上有龍池

黃潭山

分水縣志在縣北二里

白雲山

嘉靖浙江通志在縣北二十里

鳳凰山

萬曆嚴州府志在縣北二十五里形如飛

鳳

勞山

舊浙江通志在縣八都三十五里俗名豪山

三姑山

分水縣志在縣北四十里地名麻源

學士峰

舊浙江通志在縣西四十里十八峰排列

故名

胥嶺

萬歷嚴州府志在縣南六十里上有子胥廟

歌舞嶺

嚴州府志在縣南五十里路通建德

塔嶺

嚴陵志在縣西五十里路通淳安

桐嶺

分水縣志在縣東六十里路通新城

湯安嶺

舊浙江通志在八都麻姑源

千佛巖

嚴陵志在縣東十五里昔有邑人方子容

因母病鑿山作千佛於此

雲峰巖

新定續志在縣西北二十五里四面如削

一峰宛在雲中

百聖巖

新定續志在縣東一十五里其高為邑最

楊山洞

嚴州府志在縣西北四十里洞中可容百

人崖上乳滴如羅漢像相傳昔有異人楊嵩隱此

錦溪

萬厯嚴州府志在縣東十里有渡通桐廬

天目溪

新定續志源出天目山縹縣境而南達於

浙江可勝百斛舟

印渚溪

萬厯嚴州府志在縣北十里有渡通於潛

千佛潭


舊浙江通志即新功德水縣西三十里安

禪寺前

鐘潭

名勝志在縣東北二十五里相傳有古鐘沒

於下其紐可見漁人撼之莫能動



浙江通志卷十九